

四庫全書

史部

欽定四庫全書

五代會要卷十六

宋 王溥 撰

刑部

後唐長興二年八月勅御史臺每月支錢三百千充曹
司人力紙筆糧課其大理元支二百千刑部一向未曾
支給宜於兩班罰錢及三京諸道贓罰錢內每月支錢
一百千賜大理寺刑部兩司其刑部官吏不多兼使紙

筆校少宜於所賜錢內三分支與一分

其月二十九日勅刑部大理寺宜各置法直官兩人仍
名曉法令者充

四年四月勅刑部大理寺御史臺奏三司官每推斷案
牘時特與免朝恐滯推覆法官推覆時不得私行人事公
事畢日朝叅如常

晉天福三年三月詳定院奏前守晉州洪洞縣主簿盧
粲進策伏以刑獄至重朝廷所難尚書省分職六司天

下謂之會府諸道決獄若闕人命即刑部不合不知欲請諸州府凡斷大辟罪人訖逐季具有無申報刑部仍具錄案欸事節併本判官馬步都虞候司法叅軍法直官馬步司判官名銜申聞或有案內情由不同刑部請行勘覆從之

司門

梁開平三年十月勅故過所先是司門郎中員外郎出給今寇盜未平隱漏姦詐宜令宰臣趙光逢專判凡出

給過所先具狀經中書點檢判下即本司郎中據狀出給

晉天福三年六月勅應管關令丞等宜准唐天成四年四月勅本司不得差補祇委關鎮使鈐轄今日已前差補者宜令盡時勒停訖

漢乾祐元年七月六日勅左司員外郎盧振奏請應有經過關津州府諸色人等並須于司門請給公驗令所在辨認方可放過宜依所陳頒示天下仍令司門准向來

舊規合施行事件仔細條舉奏聞

禮部

後唐天成三年十一月二十一日尚書禮部員外郎和凝奏臣當司補奏齋郎今重起請如後

一應請補齋郎等舊制當司祇憑都省發到狀便給補牒旋團甲申奏伏緣當司已前久無正官多是諸司權判或有投狀多時並不團奏或有纔投文狀即先團奏遂致積聚人數不少自同光二年二月後至今年十月

已前共計二百一十人未曾團奏今臣點檢除有碍格
條一官並補兩人三人并使祖廕者落下外猶有一百
七十餘人人數既多虛謬不少若取年深者團奏終成
積滯今欲限一月內並須正身將已前所受補牒到當
司磨勘後委是正身及是嫡子年顏人材不謬者團甲
引過中書門下引驗後一齊申奏

一合使蔭官請自今後若遇改官須是轉品即許更補
一人明言是長子次子仍須不得過三人其所補齋郎

五品已上廕太廟齋郎六品廕郊社齋郎仍須是嫡子以姪
繼院者即初補時狀內言某無子今以姪某繼院為子使廕
一應補齋郎等祇憑都省發狀便給補牒請自今後須
得正身齋狀到當司比試呈驗除三省官外並引驗告
亦及取保任官狀委是親子即給補牒每年旋於八月
上司具狀解送赴南曹仍團奏時別具子細三代鄉貫
使官廕狀齋赴中書門下引驗候無差謬即得團甲申
奏仍每年祇限團甲奏一年一甲三十人以為常式

一按六典所補齋郎並兩試小經取粗通文義者充補之後非久為官若不達經書則奚通吏治請自今後齋郎所投文字狀並須親書仍須念得十卷書者即得補奏一使父皇任官廕者並須將前任告赤呈驗仍取在朝三員清資官充保及移牒所曾任官臺省寺監勘有此官及年月日同否委無虛謬即得補奏仍准千牛進馬例不得過十年其所使祖皇任官廕者年月深遠難知仔細今後請不許補奏從之

長興二年十月勅應千牛進馬齋郎遇有員缺據資廩
合得先受與收補後受官者據月日次第施行如或徇
私公然越次本人及官吏當行責罰仍令御史臺常加
察訪

周廣順元年八月吏部南曹先為去年冬集選人年滿
室長季溥張宗義為奏補不依年限駁放後便值兵火
失墜補牒優牒申中書門下取裁欲判依選人失墜文
書例出給公憑奏勅宜令所司各出給失墜文書公憑

候參選日磨勘理本官選限外仍各殿兩選應乾祐元年已來及自今如有齋郎奏補後年限滿合定冬集及改補室長時有違格條不依年限者違一年殿兩選違二年殿三選二年已上不在施行之限

祠部

後唐長興二年七月勅天下州府應有載祀典神祠破損者仰給公使錢添修

周顯德二年五月六日勅兩京諸州府每年造僧帳兩

本一本申奏一本申祠部逐年四月十五日後勒諸縣
取索管界寺院僧尼數目申州司攢帳委錄事叅軍本
判官點檢至五月終已前文帳到京如出限不到及漏
畧僧尼寺舍申奏鹵莽其本判錄事叅軍及州縣官典
並等第科斷今後僧尼籍帳內無名者並勒還俗如有
身死還俗逃亡者旋申報逐處州縣次年帳內開脫其
餘巡禮行脚出入一切取便其年諸州供到僧帳見存
寺院二千六百九十四所廢寺院凡三萬三十六見在

僧四萬二千四百四十四尼一萬八千七百五十六至
五年七月勅今後僧帳每三年一造其程限准元勅施
行三年十一月詔廢天下淫祠仍禁擅興祠宇如有功
績灼然合建置廟貌者奏聽勅裁

虞部

後唐長興元年十月國子尚書博士田敏奏請依春秋
藏冰班冰之義以消陰陽愆伏之沴勅藏冰之制載在
前經獻廟之義廢於近代既朝臣之特舉按典禮以宜

行田敏所奏祭司寒獻羔事宜依其桃弧棘矢事久不行
理難備創其諸侯亦宜准往制藏冰

祕書省

周顯德五年閏七月祕書省奏奉今年七月七日勅節
文刪集見行公事送中書門下者當省逐季准祠部牒
到盡日預先牒著作局修撰祝文兼牒太常禮院詳定
神名首尾及准太常寺牒到逐季五岳四瀆牒著作局
修撰祝文牒太常禮院詳定神名候太常宗正兩寺供

到祝版及獻官名銜省司帖着楷書修寫

殿中省

漢乾祐三年八月殿中省奏當司儀仗車駕都洛京時所差至今管係逐年分番祇候執擎儀仗昨京兆府奏依千戶例差使伏恐忽有大禮無人供應勅殿中省執擎儀仗關西道色役人員地理遐遙分番勞擾宜據姓名並還州縣今後執擎人缺別奏取裁

內侍省

後唐同光元年十一月以左監門衛將軍判內侍省李
紹宏兼內局紹宏在莊宗皇帝潛龍日為中門使及即位
命潞州監軍張居翰與郭崇韜為樞密使以紹宏為宣
徽使心常不足崇韜知之乃置內局之名凡天下錢穀
簿書悉委裁決州縣供帳煩費議者非之

天成元年四月中書門下奏請廢諸道監軍使並內司
從之

太常寺

後唐長興三年正月太常卿劉岳奏先奉勅刑定鄭餘慶書儀者臣與太子賓客馬縞太常博士段顥田敏路航季居浣太常丞陳觀等同共詳定其書送納中書門下奉勅宜差左散騎常侍任贊右散騎常侍楊凝式兵部尚書梁文矩工部尚書崔居儉太子賓客裴高尚書左丞王權尚書吏部侍郎姚顥等七人與劉岳再於鄭餘慶書儀內仔細檢詳除文臣起復及士庶冠婚准勅刑集其中節文倘有過繁過簡不能施行亦須具言另

件別書出今詳定式樣其不可改易者亦須具言請仍舊
施行

周顯德五年閏七月太常寺奏准勅節文刪集見行公
事送中書門下者謹具如後

每有四季祇應諸郊壇廟御署祝版並是牒三司起
請却於少府監請祝版差人吏部抄寫細名銜牒祕書
省寫文牒閣門進署訖齋赴祠所遇鑾駕巡省准堂判
於留守衙書御名祇應逐年四季諸州府祭嶽鎮海

瀆祝版當司于進奏院抄寫本州細名銜具錄牒祕書院撰文書寫牒閣門進署分付本州如鑾駕巡省亦於留守衙書御名四季諸郊壇廟築盛禮料諸般物色並是逐季計算申請牒省支給逐處請領納太廟禮料庫逐月却於禮料庫請領逐祭分擘十數升合齋赴壇廟祇應兼勾當諸處焚奠火龍

宗正寺

周顯德五年閏七月宗正寺奏准勅節文刪集見行公

事送中書門下者謹具如後

見管齋郎室長逐季候大饗捧饌行禮及出給每年行事
厯子見管禮料庫收貯諸司納到諸郊壇廟祠祭禮料
逐月給付逐季太廟並別廟祠祭祝版當寺於少府監請
領送祕書省書寫畢却將應奉祠祭候年滿則將齋郎室
長於每年八月印發文字解送赴南曹

光祿寺

周顯德五年閏七月光祿寺奏准勅節文刪集見行公

事送中書門下者謹具如後

逐年四季諸壇郊廟祠祭大祠中祠小祠並朔望告廟
等逐季所請禮料並牒省於諸庫務請領送納入禮料
庫逐月旋具祭數請領於本庫寺封記赴祠部造饌供
應四般肉醬並鹿脯諸司元指揮在御厨年久制造合
使升合斤兩請領供應皇帝親拜南郊自太廟朝饗至
郊壇供給並鑾駕巡幸准例城門外輶祭告天地社稷
太廟各合申請禮料供應

太僕寺

周顯德五年閏七月太僕寺奏准勅節文刪集見行公
事送中書門下者謹具如後

諸郊壇廟祠祭昊天上帝上辛一祭無羊太社太稷皇
地祇逐祭各供犢子一頭羊一口神州地祇朝日夕月
百神已上四祭並太廟逐祭元供犢子一頭羊一口准
顯德二年八月勅皆不用犢今逐祭供羊一口黃帝青
帝赤帝白帝黑帝元逐祭祇供犢子一今亦准勅用羊

一口代九宮貴神先農風雨五龍文宣王武成王逐祭
各供羊一口司寒逐祭供黑羊一口先牧馬祖馬社馬
步靈星中霤逐祭各供羊肉一斤半司中司命司人司祿
逐祭各供羊肉六斤太廟朔望祭逐祭供羊肉七斤羊
心肝肺一副鑾駕出宮城門外輶祭別供羝羊一口差
寺丞一員充獻官禘饗逐祭供羊二口已上犢子寺司
申省准指揮下開封府收買交付當寺其羊並肉等亦
准省牒於牛羊司請領供應

大理寺

後周長興二年八月勅今後大理寺官員宜同臺省例
升進其法直官比禮直官任使兼御史臺每月支錢三百
千充曹司人力紙筆糧課其大理寺先支二十千與臺
中比類全少宜於兩班罰錢及三京諸道贓罰錢內每
月支錢一百千與大理刑部兩司其刑部人力不多所
使紙筆校少仍與所賜錢內三分支與一分

其月十一日大理卿李廷範奏當寺今有要切事節謹

具逐件如後

一件寺司每奉勅旨斷案准格須委法直司據罪人所犯檢定法條本斷官將所犯罪名並所檢法律及法書本卷對驗不差然後逐件於法狀上署名下供定斷伏見寺司案內每將法直官所檢條件法狀備錄在詳斷案伏准格文法直官祇合錄出科條勘押入案至于引條判斷合在曹官仍不許於斷狀內載法直官姓名者自今已後其法狀臣欲落下留充寺司案底不錄在奏

狀中冀免元勅法狀三重在案其本斷官仍於斷狀後具言臣所斷前件文案皆是將法直司所驗條法一周細詳認悉是罪人所犯科條或言將某色律條比附詳斷逐件叅檢並無漏落法律及無欠少案內事節一件格文內太和四年十二月二日刑部員外張諷奏大理官結斷刑獄准舊例自卿至司直評事皆許各申所見陳論伏以所見者是消息律文附會經義以讞正其法非為率胸臆之見騁章句之說以定罪名近者法

寺斷獄例皆緝綴詞句漏畧律文且一罪抵法結斷之詞或生或死遂使刑名不定人徇其私臣請今後各令尋究律文具載其實以定刑辟如能引據經書辨析情理並任所見詳斷若非禮律中所載不得妄為判章出外所犯之罪

一件詳刑定罪實在法律一科須是犯人本條或取比附詳斷自今後大理寺詳斷文案祇得以本犯一條法律斷罪不得更將稍似格律於本條前後安排如是罪

人合以官品減等官告贖罪之類條件即許于法狀內次第區分又奉勅大理每有詳斷刑獄案牘准律須具引律令格式正文又稱准格詳獄一切取最末勅為定後勅合破前格今後凡有刑獄先引律令格式有無正文然後檢詳後勅須是名目條件同即以後勅定罪勅內無正條即以格文定罪格內又無正條即比附定刑先自後勅為比事實無疑方得定罪或慮律令難明錄奏取裁取法直官不隱法文狀在案本斷官祇

據憊狀書法定罪不得輒使文章及有徵引刑部詳覆官法直官亦准此無自此御史臺大理寺准推斷刑獄之際刑法官及諸朝臣不得以見所推斷人罪名合使條格奏請改易刑法中或有不便於事者任具奏聞餘依李廷範所奏

四年二月大理正張瑒奏曰臣伏見咸通十年二月二十九日大理少卿劉慶初奏請於法寺置議獄堂每奉勅詳斷刑獄畢集大卿二少卿二正六丞四司直八評

事十同於議獄堂叅詳令依典式其法官中能辨雪冤
獄迹狀尤異者二人已上者請書上下考三人四人
已上者超資與官今欲望依慶初所奏法寺置議獄堂
凡斷公事並集法官詳議然後連署奏聞天下諸州案
牘亦望本判官與副使已下督廳會議勅法寺議獄宜
且於寺卿廳內法官賞罰宜依所奏天下州府有疑者
判官集議尋常案款則准法施行

晉天福五年九月二十七日大理寺申當寺自前每月

公案一道除斷狀外須全寫三本內一本申奏一本送刑部一本下本道者伏緣近年諸處公案並多寺司常慮淹延況所行斷遣案文此已舉明條法況本道已有元推公案固不煩備錄施行今欲祇錄斷狀連勅頒宣亦不礙於規矩況刑部大理寺亦是已有具案元祇以斷覆詞降勅歸司其諸道元推司今欲乞准刑部例祇降斷狀連勅施行所貴將來免滯刑獄從之

鴻臚寺

周廣順三年八月勅漢睿陵潁陵今後係鴻臚寺管

太府寺

周顯德五年七月太府寺奏准勅節文刪集見行公事
送中書門下者當寺見管銅斗一隻銅秤一量錄子一
十隻銅升一隻銅合一隻五尺鐵度一條應斗升尺給
付諸道州府及在京貨賣收係省錢斗每隻省司支作
料錢三百五十文依除官賣九百文八十陌稱每量支
作料錢二百三十五文依除官賣六百二十文八十陌

升每隻支作料錢五十文官賣一百三十五文八十陌
尺每條支作料錢三十文官賣一百八十文八十陌

司農寺

周顯德五年閏七月司農寺奏奉勅節文刪集見行公事送中
書門下者當寺每年季冬祠祭合供使芹韭菁葱葵菹等五件
准例至浥藏之時牒三司支給寺司請領藏浥準備一冬供應
少府監

後唐同光三年正月勅少府監鑄造印文元屬禮部兩

司互有推注及諸道使臣廣徵銅炭價錢自今後凡鑄印宜令本司限勅到五日內進呈不計諸道在京並不得徵納銅炭價直所破物料於租庸院請領

晉開運三年二月詔少府監今後凡修制親王婚禮法物並冊文出降公主九樹花釵箱盞宜令不得用龍鳳紅條帕

國子監

梁開平三年十二月國子監奏修建文宣王廟請率在

朝及天下見任官俸錢每貫尅留一十五文

後唐天成三年正月中書門下奏伏以祭酒之資歷朝所貴爰從近代不重此官況屬聖朝方勤庶政須弘雅道以振時風望令宰臣一員兼判國子祭酒勅宜令宰臣崔協兼判

其年八月十一日宰臣兼判國子祭酒崔協奏請國子監每年祇置監生二百員候解送至十月三十日滿數為定又請頒下諸道州府各置學官如有鄉黨備諳文

行可舉者錄其事實申監司方與解送但一身就業不得影庇門戶兼太學書生亦依此例不得因此便取公牒輒免本戶差役又每年於二百人數內不繫時節有投名者先令學官考試校其學業深淺方議收補姓名勅宜依

五年正月五日國子監奏當監舊例初補監生有束脩錢二千及第後光學錢一千竊緣當監諸色舉人及第後多不於監司出給光學文抄及不納光學錢祇守選

限年滿便赴南曹叅選南曹近年磨勘選人並不收監
監司光學文抄為憑請今後欲准往例應諸色舉人及
第後並先於監司出給光學文抄並納光學錢等各有
所業等第以備當監逐年公使奉勅宜准往例自今後
凡補監生須令情願於監中修學則得給牒收補仍據所
業次第逐年考試申奏如收補年深未聞藝業虛佔補
牒不赴試期亦委監司具姓名申奏

清泰三年五月勅國子監每歲舉人皆自四方來集不

詢解送何辨是非其附監舉人並依去年八月一日勅
須取本處文解如不及第者次年便許監司解送若初
投名未曾本處取解者初舉落第後監司勿便收補其
淮南江南黔蜀遠人不拘此例

周顯德元年十一月勅國子監所解送廣順三年已前
監生人數宜令禮部貢院收納文解其今年內新收補
監生並仰落下今後須是監中受業方得准令式收補
近年有諸州府不得解舉人即投監請補

五代會要卷十六

欽定四庫全書

五代會要卷十七

宋 王溥 撰

王府官

後唐長興四年四月以祕書監劉贊為秦王傅前忠武軍節度判官蘇瓚為秦王友前襄州觀察支使魚崇遠為秦王府記室叅軍時言事者請為秦王置師傅上顧問近臣皆以秦王名勢隆盛不敢置制請自選擇方降

是命

致仕官

後唐長興三年八月勅應內外致仕官自此凡要出入不在拘束之限

禱錄

後唐同光三年八月勅諸寺監人吏授官從來祇計勞考年滿起選方許離司近日以來頗墮舊制到司曾無考課公事尚未諳詳便求薦論深為僥倖遂使故事都

廢蓋由舊人不存豈惟勞逸不均兼致司局曠敗自今
除年勞考滿三銓官即許赴任非時不得奏薦如有主
掌重勞績可稱許赴司奏聞當與減選或是顯然事
迹在司年深祇後不任即許解職赴任餘依格條處分
天成四年九月勅諸司寺監凡有文簿施行奏覆司長
須與逐司官員同簽署申發不得司長獨有指揮其主
印官或請假差使其印須依倫次主簿不得踰越

長興二年八月勅應諸司職掌人吏前後選授州縣官

考滿日委本處申奏各追還司職依舊職執行公事

四年六月十日勅起今後諸司初除官勅留職人吏等
並於省員州縣判司簿尉內除授免侵使見親公事正
員及不支料錢

周顯德三年十月勅應諸司寺監今後收補職役人等
並須人材俊敏言行可採書禮分明履行清謹勅本司
關送吏部引驗人材校考筆札其中選者具引驗可否
連所試書迹並驗本州府不係色役迴文及正身引送

中書後吏部具夾名聞奏候勅下勒本司收補餘從前
後格勅處分每年祇得一度奏補其諸司寺監舊額人
數仍令所司量公事繁省於未奏補人數內酌詳增損
別為定額

試攝官

後唐天成元年十月十六日勅朕以削平區宇撫育蒸
黎頃當災歎之餘未絕瘡痍之苦緬維邦本寔係官常
苟未致於雍熙則曷寧於宵旰必在求之良吏委以親

人倘或因循遂成勞擾先朝以選

闕攝官既無尤多

闕

近年以來銓註無幾遂至諸道州縣悉是攝官既無考課之規豈守廉勤之節而況多因薦託苟徇請求替罷不常迎送為弊殘民害物熾然成風言念所深焦勞何已宜令三司及諸道州府據見任攝官如未有正官具差攝月日錄名申奏如已後或為公事及月限已滿乞行替移即須具月日并選差將來攝官歷代職任姓名聞奏替免無故頻有替換如有內外臣僚輒行薦託當

舉憲章

四年正月勅大理寺近為陵臺令冒稱試銜按法以詐假論又據長定格選人無出身未曾任正員官使虛銜散試官奏受正員官及權知權判等官未得資自以諸事故解官並立選集限勅天下州府例是攝官或因勘窮遂為詐假法書中雖云不可選條內其奈不無今日以前或有稱試銜者一切不問此後並宜禁止

晉開運元年十二月中書門下奏諸司寺監若無私不

合一例差署攝官況目前元無勅命指揮又不曾具名
奏聞其太常寺太祝奉禮逐年祇應祠祭行事不可缺
人其太常寺已差攝官滿五年者宜比三傳出身其餘
諸司寺監今日已差攝官滿五年者宜比明經出身今
既稍已年滿者各委本司一月內具所差年月鄉貫三
代申奏下中書追引本司差攝文牒及親公事文書點
檢不虛奏覆勅下後方理選數仍給與優牒候合格日
赴選如攝太常寺太祝奉禮有已滿三年已上者亦

許一齊奏請候滿五周年准前事例施行其餘諸寺
監攝未滿五年者不在施行兼今後諸司寺監不得
更差攝官其太常寺除正官數少宜許差前資判司
主簿及黃衣選人充仍先具姓名申奏取裁不得充原
額人數所攝一任限三周年為滿每年與減一選候
罷攝日准前給與優牒候本選合格日執優牒赴選
從之

三年五月勅有司差攝官員今日已前任攝滿五年者

宜追驗本司差攝文牒及親公事文書並鄉貫三代點檢與授初官起今後所司如更有闕須差攝官者可具所攝鄉貫三代奏聞

周顯德元年正月一日赦節文其諸寺監官奴滿七周年已上應奉公事無遺闕文書灼然者並與同明經出身如不滿七周年者任逐便穩今後寺監不得以白身署攝如違本司官文並行朝典

其年十一月二十二日勅節文起今後諸處州縣官考

限已滿替人未到間宜令且守本官執行公事仍令依舊請俸不得擅離任所州府亦不得差署攝官替下如有遭憂停任身故假滿百日及非時闕官之所祇可差人承攝

六年七月二十三日勅攝官承乏或久廢於公勤因時側揚宜特行於旌錄諸處自前應有攝官曾經五度者與一時出身仍先令所司磨勘須得任親公事文書解由分明每攝須及半年已上方得充為任數仍令所司

引驗人材及考試書判灼然堪錄用者方得施行

偽官

後唐同光三年閏十二月勅初平偽蜀應偽署官員等
官至太師太傅及三少並太尉司徒司空侍中中書令
左右僕射已上並宜降至六尚書臨時更酌高下為六
行次第階至開府特進金紫者文班降至朝議大夫武
班降至銀青爵如是舊偽署將相已上與開國男三百
戶餘並不許有封爵其有功臣名號並須削去如檢校

官至郎中員外郎兼侍御史已下如是偽署節鎮率先
向化及立功效者委行營都統緣事迹授任如刺史除
停罷外有見任政績可稱者但許稱使君不得更有檢
校及兼官其偽署班行正官四品已上依此降絀五品
已上如不曾經本朝授官又無族望可稱者材智有聞
即許於府縣官中量材任使如無材智可錄者並宜放
歸田里若西班有稱統軍上將軍者若本是功臣子孫及將
相之後並據人材高下與諸衛小將軍率府副率中郎將

次第授任如是小將軍以下堪任使者委西川節度使補衙前押衙已下職所有歸降官除軍前任使下並稱前銜續據才行任使

應順元年三月二十日勅節文如有賣官買官人等並准長興四年三月二十七日斷魏欽緒犯買官罪決重杖一頓處死勅處分其詐假官及冒名接脚等並准律文及天成元年九月十六日勅指揮

漢乾祐二年四月中書門下奏准吏部南曹鑱宿內選

人中有契丹會同年號厯子解由考牒未審合各令改就天福年號為復別有指揮奉勅應是偽命文書不在施行之限者今有緣晉朝授官契丹年給解由厯子若執格勅又慮有廢身名凡州縣幕府曾授契丹偽命者追毀文書祇取唐晉朝出身文書參選本選外仍殿五選降三資注擬凡唐晉朝諸科及第人於契丹年號內出給文集許追毀換給仍自新給年月日理選從之

御史臺

後唐同光二年三月二十日御史臺奏所除勘諸道節
度觀察防禦經畧等使刺史縣令及諸道幕府兼諸
司帶憲銜兼官合納光臺錢謹具本朝元納及減落錢
數如後兼御史大夫元納三十千減外納一十五千
兼御史中丞元納二十千減外納一十千兼侍御史元
納八千三百減外納四千一百五十兼殿中侍御史元
納一十一千三百減外納五千六百五十兼監察御
史元納一十三千三百減外納六千六百五十以前臺

司准本朝例及減落後所徵錢數分析如前

應有諸道節度觀察使經畧防禦等使及諸道幕府
上佐官並諸司班行新受兼官者並合送納前件

光臺憲銜禮錢今欲准例勒辭謝樞使官申報兼牒兵
部勅告身案除在宣取外准例候送納光臺禮錢畢朱
鈔到方可給付仍轉帖諸道進奏及諸州使後院等准前事
例申報催徵無致有隳舊規從之

周顯德五年閏七月一日御史臺申見行事件應新除

節度防禦團練刺史賓幕州縣官兼帶五院憲銜合徵
光臺禮錢如是已曾納過准舊例不徵兼御史大夫元
徵三十千今徵六千兼御史中丞元徵二十千今徵四
千兼侍御史元徵八千三百今徵一千六百六十兼殿
中侍御史元徵一十一千三百今徵二千二百六十兼
監察御史元徵一十三千三百今徵二千六百六十
天成元年十二月十一日御史臺奏本朝舊例合行公
事如後

應諸道進奏院准本朝例各合置臺巡驅使官一員凡有公事並合申臺巡逐日在臺應奏公事

應諸道進奏官每四季月初及五月一日冬至並新除大夫中丞並合臺叅伏自偽朝以來全隳舊制今准勅命條疏請准舊例施行

應諸道節度觀察防禦經畧團練使及諸州刺史新除赴任及幕僚上佐官等得替及准由進奉到闕及歸本道並合廊叅正衙謝見辭如遇大夫中丞入臺並合臺

衆凡有公事及到發日並合申報如違追勘進奏官右
典偽朝以來全隳往制罕成倫理頗失規繩伏乞特降
明勅指揮不令隳紊從之

長興三年三月勅近月累據御史臺奏陳狀訴屈人據
狀內皆是訊鞫多時却曉示陳狀人送道依次第論對
及州府追到本支證本人又不到彼處恐紊規繩須行
條理宜令御史臺今後諸色人論訟稱已經州府斷遣
後抑屈更不在牒本道勘逐便可據狀施行若未經州

府論訴驀越陳狀可具事由勒本道進奏官差人齎牒
監送本處就關連人勘斷訖奏

四年五月二十五日御史中丞龍敏等奏陳事如後
一臺司除御史中丞隨行印及左右巡使監察使並出
使印等外其御史臺印一面先准令式即是主簿監臨
近年以來緣無主簿遂至內殿御史權時主持又常隨
本官出入不定伏緣臺中公事不同諸司動繫重難常
虞留滯當申奏申堂之際及牒州府之時事無輕重並

使此印今准令式逐日有御史一員臺直承受制勅公文其御史臺印今後欲勒留臺中不令在外選差令史一人帖司一人同知此印凡有諸色大案印發之時准指揮諸司各置印厯一道具其事節件數書在厯中即於直官面前點檢印發其印至夜封閉俟交直轉付下次直官共議執行

一御史臺前總朝綱執事天憲所管人更色役最多上至朝堂次及班列或在京勾檢公事或外地推勘稽遲

監守狴牢行遣案牘或隨從出使或祠祭監臨凡有係於臺司皆須藉其人吏俾無闕事以贖國容近年以來人數極少及月限者授官出外為官滿者追召未來人力不充公事停滯今欲于諸州使院內量事差取十人據臺中諸司闕人臨時量材填補者

一其臺中令史今欲條流凡出官考滿却來歸司者便具到日申所司繫其選限如有經年不到追召不來即具申堂便乞除落姓名奉勅宜依凡京百司人吏考滿

歸司繫其選限亦宜令准此

周廣順二年十月勅今後凡有百姓訴論及言災沴先訴於縣縣如不治即訴於州州治不平訴於觀察使斷遣不當即可詣臺省申訴如或越次論訴所司不得承接如有詆犯准律科懲

御史大夫

後唐天成元年六月以李琪為特進行御史大夫自後不除

御史中丞

後唐天成元年十一月諸道進奏官等狀臣等今月四日中丞上事禮合至臺比期不越前規依舊傳語忽蒙處分通出尋則再取指揮要明審的又蒙問大夫相公上事日如何臣等云大夫曾為宰相進奏官伏事中書事體之同實為舊例若以別官除受合云傳語又兼傳指揮便令通出臣等出身藩府罕習朝儀拒命即恐有奏陳遵稟則全隨儀矩伏恐此後到臺叅賀規則不定

者勅御史臺是中朝執憲之司乃四海繩違之地凡居
中外皆俟整齊藩侯尚展於公叅邸吏豈宜於抗禮據
觀論列可驗輕誣但以喪亂弘多紀綱隳紊霜威掃地
風憲銷聲今則景運維新皇圖重整宜加振舉漸止
澆訛宜令御史臺凡闕舊例並須舉行稍不稟承當
行朝典時盧文紀初授中丞領事於御史府諸道進奏
官來賀文紀曰事例如何臺吏喬德威等言朝廷在長
安日進奏官見大夫中丞如胥吏見長官之禮及偽梁

將革命本朝微弱諸藩強據人主大臣皆且姑息邸吏
時中丞上事邸吏雖至皆於客舍傳語竟不相見自經
兵亂便以為常文紀今臺司諭以舊儀相見據案端簡
通名贊拜邸吏輩既出怒不自勝相率於閣門求見騰
口喧訴上謂趙鳳曰進奏官比外何官鳳對曰府縣發
遞祇候之流上曰乃吏卒耳安得慢吾法官乃下此勅
晉天福五年二月以御史中丞為清望正四品

侍御史

晉天福四年三月御史臺按六典侍御史掌糾舉百寮
推鞠獄訟居上者判臺知公廨雜事次知西推贓贖三司
受事次知東推理匭伏乞今後准故事施行勅宜依舊
制尋以尚書駕部員外郎兼侍御史知雜事劉暉為河
南少尹自是無尚書郎知雜事者

其年五月御史臺奏尚書郎知雜事之時赴臺禮上軍
巡邸吏咸集公叅府司兩縣皆呈印杖今御史判雜上
事欲准前例從之

開運二年八月勅御史臺准前朝故事以郎中員外郎一員兼侍御史知雜事近年停罷獨委年深御史知雜振舉之司紀綱未峻宜遵故事庶協通規宜於郎署中選清慎強幹者兼御史知雜事

殿中侍御史

後唐天成二年九月二日御史臺奏每遇入閣日祇一員侍御史在龍墀邊祇候彈奏公事或有南班叅雜失儀點檢不及難於舉奏者今欲依常朝例差殿中侍御史

二員於鐘鼓樓會位各綴供奉官班出入所在共為糾察從之

監察御史

後唐同光二年五月御史臺准本朝故事六察合行職事如後

吏察應吏部南北兩曹磨勘選人各具駁放判成人名銜牒報分察使及三銓應鑠銓注官後具前銜名擬報分察使點檢若有踰盜即察使舉追本行人推鞠

戶察應戶部司諸州戶帳貢物出給蠲符具事件合報
察使

兵察應兵部公事一一合報察使

刑察應刑部法律赦書德音流貶量移斷罪輕重合報
察使

禮察應禮部司補轉鑄印諸祠祭料法物合報察使
工察應工部司工役合報察使

右御史臺六員監察謂之分察使但緣曠廢久不舉行

今欲依條貫施行從之

御史臺主簿

後唐天成四年八月御史臺孔目官閻珪狀分析每大夫中丞奏請雜端主事等官承前隨廳罷任其主簿朱頴見任伏候勅裁勅諸道賓從即隨府罷臺主簿既為正秩沈入選門顯自勅恩須終考限朱頴宜仍舊官

知班

周廣順三年三月十四日殿中侍御史賈玘殿中侍御

史劉載狀申自漢朝次每遇內殿起居臺司定左右巡使先入起居後於殿庭左右立定百官始入起居有失官儀便宜彈奏者今後欲依入閣彈奏儀折署奏後宣徽使言所奏知通事舍人喝拜再拜訖便退如兩巡使自有失儀亦候班退互相彈奏

推事

周顯德五年閏七月一日御史臺申臺司見管四推臺一推臺二推殿一推殿二推臺或准勅命宣頭堂帖指揮

送到公事並諸道州府論訴准例一人以上三院御史從上輪次配推兼具差定推官名銜申奏申中書門下如是三人以上即本彈推勘若四推皆有公事外更有刑獄即差以次官推勘兼逐日輪差官吏臺直點檢刑獄

出使

周顯德五年閏七月一日御史臺申臺司或准勅命宣頭委臺司差官出外推勘刑獄舊例於監察御史內

從下差定如是特勅定名不拘此例

雜錄

後唐天成四年三月二十日御史臺奏臺中舊有格杖近年不行每有決遣公事皆於河南洛陽兩縣追借人杖今臺中常有囚徒勘責若一一於兩縣追借又緣地里遙遠及候差人往來各有妨滯今臺請置常行人杖免有住滯公事從之


晉開運二年八月勅今後諸御史宜令除准式請假外

不得以私故小事請假離京並除奉制命差勘公事及
案察外不得以瑣瑣細事差使出外

漢乾祐三年五月殿中侍御史竇文靖奏臺中糾彈過
失舊有十六僊事節次不舉明臣訪聞朝官有便服徒
步城市者既通閩籍實汚朝風勅宜令御史臺常加察
訪具以名聞當行譴逐隱而不言與之同罪

周顯德二年四月三日勅起今後應有自外新除御史
未經朝謝者經過州府不得受館驛供給及所在公禮

時有庾元晟居秦雍間拜殿中侍御史遽入秦州驛受
軍州禮上知之故有是勅



五代會要卷十七

欽定四庫全書

史部
五代會要卷十八至
二十二

詳校官起居注事臣顧宗泰

編修臣程嘉謨覆勘

總校官編修臣王燕緒

校對官中書臣高 中

謄錄監生臣黃臣鵠

欽定四庫全書

五代會要卷十八

史館移置

宋王溥撰

周廣順三年九月勅入厚載門內向東橫街東地房宇
宜令弘文館集賢院于此分擘解署

諸司送史館事例

後唐同光二年四月史館奏本朝舊制中書并起居院

諸司及諸道州府合錄事件報館如右

時政記中書門下錄送起居注左右起居郎錄送兩省轉對入
閣待制刑曹法官文武兩班上封章者各錄一本送館天文祥變
占候徵驗司天臺逐月錄報並每月供送歷日一本祥
瑞禮部逐季錄報並諸道合畫圖申送藩客朝貢使至鴻
臚寺勘風俗衣服貢獻物色道里遠近並具本國王名錄
報四裔入寇來降表狀中書錄報露布兵部錄報軍還
時并主將姓名具攻陷虜殺級數并所因由錄報變改

音律及新造曲調太常寺具錄所因并樂詞牒報法令
變革斷獄新議赦書德音刑部逐季具有無牒報詳斷
刑獄昭雪寃濫大理寺逐季牒報州縣廢置及孝子順
孫義夫節婦有旌表門閭者戶部錄報有水旱蟲蝗雷
風霜雹戶部錄報封建天下祠廟叙封建封邑號祠司封
錄報京百長官刺史以上除授文官吏部錄報武官兵
部錄報諸色宣勅門下中書兩省逐月錄報公主百官
定謚考功錄行狀並謚議逐月具有無牒報宗室任官

課績并公主出降儀制宗正寺錄報刺史縣令有灼然政績者本州官錄申奏仍具牒報應碩德殊能高人逸士久在山野著述文章者本州縣不以官秩勘問的實申奏仍具錄報應中外官薨已請謚許本家各錄行狀一本申送右乞宣下有司條件施行從之

長興三年司天臺奏奉中書門下牒令逐年申送史館十一曜細行歷并周天行度祥變等當司舊祇申星曜事件不載占言勅宜令司天臺密奏留中外其餘凡奏

歷象雲物水旱等事及諸州府或奏灾祥一一並申送
史館

前代史

晉天福六年二月勅有唐遠自高祖下暨明宗紀傳未
分書誌咸闕今耳目相接尚可詢求若歲月寢深何由
尋討宜令戶部侍郎張昭起居郎賈緯祕書少監趙熙
吏部郎中鄭受益左司員外郎李為先等修撰唐史仍
令宰臣趙瑩監修其年四月監修國史趙瑩奏勅同撰

唐史起居郎賈緯丁憂請以刑部侍郎呂琦侍御史
尹拙同修從之尋改呂琦為戶部侍郎尹拙為戶部員
外郎令與張昭等修唐史其年四月監修國史趙瑩奏
自李朝喪亂迨五十年四海沸騰兩都淪覆今之書府
百無二三臣等近一作度奉綸言俾令撰述褒貶或從于新意
纂修須按于舊章既闕簡編先虞漏畧今據史館所闕
唐書實錄請下勅命購求況咸通中宰相臣韋保衡與蔣伸
皇甫煥一作煥撰武宗宣宗兩朝實錄又光化初宰相臣裴贄撰僖

宗懿宗兩朝實錄皆遇國朝多事或值鑿輿播越雖聞
撰定未見流傳其韋保衡裴贄合有子孫見居職任或
門生故吏曾記纂修聞此撰論諒多欣愜請下三京諸
道及中外臣寮凡有將此數朝實錄詣闕進納請量其
文武才能不拘資地除一官如卷帙不足據數進納亦
請不次獎酬以勸來者自會昌至天福垂六十年其初
李德裕平上黨著武宗伐叛之書其後康承訓定徐方
有武寧本末之傳如此事類記述頗多請下中外臣寮及

名儒宿學有於此六十年內撰述得傳記及中書銀臺
史館日厯制勅冊書等不限年月多少並許詣闕進納
如年月稍多記錄詳備請特行簡拔不限資序臣與張
昭等所撰唐史祇叙本紀以綱帝業列傳以述功臣十
志以書刑政

本紀以綱帝業者本紀之法始於春秋以事繫日以日
繫月以月繫時以時繫年刑政無遺綱條必舉須憑長
厯以編甲子請下司天臺自唐高祖武德元年戊寅

至天祐元年為甲子轉年長曆一道以憑編述本紀
列傳以述功臣者古者衣冠之家書於圖籍中正清議
以定品流故有家史家傳族譜族圖江左百家軒裳
綴軌山東四姓簪組盈朝隋唐以來勲書王府故士族
子弟多自紀世功貴載簡編以光祖考請下文武兩班
及藩侯郡牧各叙兩代官婚名諱行業功勲狀一本如
有家譜家牒亦仰送官以憑纂修列傳

十志以書刑政者五禮之書代有沿革至開元判定方

始備儀洎寶應以來典章漸缺其謁款郊廟冊拜王公攝事相儀之文車輅服章之數請下太常禮院自天寶以後至明宗朝以來五禮儀注朝廷行事或異舊章出具增損節文一一備錄以憑撰述禮志

四縣之樂不異前文八佾之容或殊往代隋唐以來樂無中外乃有文舞武舞之制立部坐部之名天寶之初雲韶大備天寶之後音律漸衰郊廟殿庭舊章斯缺及咸泰蕩蕩覆鍾石淪已龍紀反正之年有司特鑄懸樂旋

宮之義徒有其文請下太常寺其四縣二舞增損始自何朝及諸廟樂章舞名開元十部興廢本末一一按錄以憑撰述樂志

刑名之制代有輕重隋唐以來疏為律令累朝繼有制勅相次增益舊條格律之文未能畫一請下大理寺自著律令以來後勅入格條者及會昌以來所斷疑獄一一關報以憑撰述刑法志

律歷五行天文災異史書實錄前代具書自唐季亂離

簡編淪落太史所奏不載冊書請下司天臺自會昌以來天文變異五行休咎歷法更改更據朝代年月一條錄以憑撰述天文律歷五行等志

唐初定官品令三公三師為第一品尚書令僕射為第二品兩省御史臺寺監長官六尚書為第三品自定令以後官品繼升比諸令文前後同異又有兼攝檢校之例資授冊拜之文軍容或盛於朝儀使務漸侵於省局以此官無定令位以賞功臺府之權隨時輕重求諸官

志前代無聞請下御史臺自定令以後文武兩班品秩
升降及府名使額寺署廢官名色更改一一具析以憑
撰述職官志

唐初守邊則有都督總管之號開元命將則有節度按
察之名故四塞之內刺史多没于遐荒九牧之中乘寵
遂邀於旄鉞山河異制名額實繁請下兵部職方自開
元以來山河地里使名軍額州縣之廢置一一條列以
憑撰述郡國志

唐初以降迄于開元圖書大備歷朝纂述卷帙實繁若不統而論之何彰文雅之盛請下祕書省自唐以來古今典籍經史子集元撰人名氏四部大數報館以憑撰述經籍志

右所陳條例如前請下所司從之其月起居郎賈緯奏曰伏以唐高祖至代宗已有紀傳德宗亦存實錄武宗至濟陰廢帝凡六代惟有武宗實錄一卷餘皆缺畧臣今搜訪遺文及耆舊傳說編成六十五卷目為唐朝補遺

錄以備將來史官條述至開運二年六月史館上新修前朝李氏書紀志列傳共二百二十卷並目錄一卷都計二十帙賜監修宰臣劉昫修史官張昭遠直館王伸等繒綵銀器各有差

修國史

後唐天成三年十二月史館奏據左補闕張昭狀嘗讀國書伏見懿祖昭烈皇帝自元和之初獻祖文皇帝於太和之際立功王室陳力國朝太祖武皇自咸通後來

勤王戮力剪平多難頗立大功三換節旄再安京國莊
宗皇帝親平大憝奄有中原倘闕編修遂成湮隆伏請
與當館修撰叅序條綱撰太祖莊宗實錄者伏見前代
史館歸于著作國初分撰五代史方委大臣監修自大
歷後來始奏兩員修撰當時選任皆取良能一代之書
使成於手其後源流失緒波蕩不還冒當修撰之名曷
揚褒貶之職及乎編修大典即云別訪通才況當館職
在編修合令撰述勅宜依

四年七月監修國史趙鳳奏當館奉勅修懿祖獻祖太祖
莊宗四帝實錄自今年六月一日起手旋具進呈次伏以凡關
纂述務合品題承乾御宇之君行事方云實錄追尊冊號
之帝約文祇可紀年所修前件史書今欲自莊宗一朝名為實
錄其太祖以上並自為紀年從之其年十一月史館上新修懿
祖太祖紀年錄共二十卷莊宗實錄三十卷監修宰臣
趙鳳修撰張昭遠呂咸休各賜繒綵銀器等

應順元年閏正月平章事監修國史李愚與修撰判館

事張昭遠等進新修後唐功臣列傳三十卷

清泰三年二月門下侍郎平章事監修國史姚顛上明宗實錄三十卷同修撰官中書舍人張昭遠李祥直館左拾遺吳承範右拾遺楊昭儉等各頒賚有差

漢乾祐二年二月勅左諫議大夫史館修撰賈緯左拾遺直史館王伸宜令同修高祖實錄仍令宰臣蘇逢吉監修至其年十月修成實錄二十卷上之

其年十二月勅宜令監修國史蘇逢吉與史館賈緯并

竇儼王伸等修晉朝實錄呈進從宰臣竇正固奏請也
周廣順元年七月史館新修晉高祖實錄三十卷少帝
實錄二十卷上之

顯德三年十二月勅太祖實錄並梁均帝唐清泰二主
實錄宜差兵部尚書張昭修其同修撰官委張昭定名
奏請至四年正月兵部尚書張昭奏奉勅編修太祖實
錄及唐梁二末主實錄今請國子祭酒尹拙太子詹事
劉温叟同編修伏緣漢隱帝君臨太祖之前其歷試之

績並在漢隱帝朝內請先修隱帝實錄又梁末主之上
有郢王友珪篡弒居位未有紀錄請依宋書劉劭例書
為元兇友珪其末主請依古義書曰後梁實錄又唐末
主之前有應順帝在位四月出奔亦未編紀請書為前
廢帝清泰主為後廢帝其書並為實錄從之

五年六月兵部尚書張昭遠等修太祖實錄三十卷上之

修史官

後唐長興四年正月十一日史館奏當館承前修史事

例應合編錄文書分配在館修撰直館官員逐人紀述
內修撰一員充判館事自除修撰外應館中著述及諸
色公事都端主掌監修宰臣通判前修撰直館等其間
勤恪者著述不閒怠惰者因循度日祇藉館中揚歷
以資身事進趨或別除官或因出使便將自己分合撰
史籍送付後人後人效尤依前懈墮積疊不了公事為
弊滋多須設規程庶無曠敗謹具起請如左

自判館修撰以下見充職及此後充館請以二周年為

限據在職館中文書繁簡逐季分配纂修如月未滿公
事未闕即當館給與公憑仍旋申中書門下請別商量
其職限內遇本官本省署有遞遷請不妨其序進即請
令依前充職終其月限並請不許未終職限特更除官
如職限滿有公事未了不許給月請不別與除官及差
使並與遞遷本官其曠職甚者仍請量事殿罰如據所
分配文書修撰外別能採訪得無後功臣事實及諸色
合編集事著撰得史傳堪入國史者請量其課績別加

酬獎如當館於職限滿官員中藉令充職者則旋具聞
奏乞就加陞陟

應此日已前曾充館職配過文書除丁憂官員則請與
均分代修撰其未了別除官者所欠文書不計多少並
與令本官修撰速須了畢其今日已前曠墮之過特乞
矜宥起今後若更將已前未了公事遷延不速修撰了
者則別具奏聞仰候聖裁右奉勅宜依仍付所司

其年七月以著作佐郎尹拙為左拾遺直史館王慎微

為右拾遺直史館從監修宰臣李愚奏也故事以本官直館者皆為畿縣尉今諫官直館自拙等始也

史館襍錄

後唐同光二年四月史館奏四庫書自廣明年後散失伏乞許人進納仍中書門下降勅條件勅進書官納到四百卷已下皆成部帙不是重疊及紙墨書寫精細已在選門未合格人每一百卷與減一選無選減者注官日優與處分無官者納書及三百卷特授試銜

天成二年八月起居郎趙熙奏今後凡公事及詔書奏對應不到中書者伏乞委內臣一人旋具抄錄月終關送史館勅宜令樞密院學士月終錄送

長興二年三月二十八日史館奏當館應諸處及諸關送到合編錄公事外伏准舊例國朝有時政記並起居注並合送館以備纂修近代以來缺行此事祇以每遇入閣兼內殿起居朝臣待制轉對公事逐人抄送當館如是顯有頒行逐司關報到者旋逐件於日曆一一收

監其有直下所司並不行之事當館無由得知若祇憑本官供到所奏本未免簡編不備本末難窮者前件待制轉對公事等除顯有頒行關送到館外應有直下所司及不行未行之事伏乞宣付當館旋依次第編錄其時政記起居注並內庭逐日合書日曆亦乞相次施行奉勅朝臣起居入閣奏對公事奏覆後宣付史館宜依其時政起居注候別勅處分

其年四月四日史館奏當館昨為大中以來迄于天祐四朝

實錄尚未纂修尋具奏聞謹行購分募勅命雖頒於數月
圖書未貢於一編蓋以北土州城久懼兵火遂成滅絕難可訪求
竊恐歲月漸深耳目不接長為闕典過在攸司伏念江表列
藩湖南奧壤至於閩越方屬勲賢戈鋌自擾於中原屏
翰悉全於外府固多奇士富有羣書其兩浙福建湖廣
伏乞特降詔旨委各於本道採訪宣宗懿宗僖宗昭宗
以上四朝野史及逐朝日歷除目銀臺事宜內外制詞
百司沿革簿籍不限卷數據有者抄錄進上若民間收

得或隱士撰成即令各列姓名請議爵賞從之

四年正月十一日史館奏當館先奉勅修撰功臣列傳元奏數九十二人館司分配見在館官員修撰其間亦有不是中興以來功臣但據姓名便且分配修撰將來允當須在品量其間若實是功臣中興社稷者須校其功勳大小德業輕重次第纂修排列先後今請應不是中興以來功臣汎將行狀送館者若其間事有與正史實錄列傳內事相連絡者則請令附在紀傳內簡畧書出其無

功于國無德于人但述履行身名或錄小才末技倘無
可以垂訓者並請不在編修之限伏自有史傳以來歷
代咸有著述皆存定制不可更張如前漢止述蕭曹絳
灌之流後漢但書寇鄧耿賈之列並同翼戴咸共匡扶
爵號功臣先為列傳其餘宗室外戚文苑儒林游俠逸
人循吏酷吏之屬名目甚衆各有篇題並隨具次第撰
述其大惡大善之人有善若周孔夷齊惡若敦元莽卓
亦各特為著撰不附傳紀編修或為世家或為列傳蓋

欲取監前代垂則後人不可雷同請令區別其功臣未
納到行狀者館司見更催促候到即更分配修撰大凡
行狀皆是門人故吏叙述多有虛飾文華今請此後所
納行狀並須直書功業不得虛紀文詞其已納到行狀
合著撰者仍請委修撰官畧其浮詞採其實事從之
應順元年正月勅今後三館所闕書並訪本添寫其進
書官權宜停罷

晉天福四年十一月史館奏按唐長壽二年右丞姚璿

奏帝王謨訓不可闕文其仗下所言軍國政事令宰臣一人撰錄號時政紀唐明宗朝又委端明殿學士撰錄逐季送付史館伏乞遵行者宜令宰臣一員撰述

周顯德元年十月監修宰臣李穀奏今之左右起居郎即古之左右史也唐文宗朝命其官執筆立於殿堦螭頭之下以紀政事後則明宗朝命端明殿及樞密院直學士皆輪修日歷旋送史館以備纂修降及近朝此事皆廢今後欲望以諮詢之事裁制之規別命近臣旋具

抄錄每當修撰日歷即奉封送吏臣從之因命樞密院直
學士起今後于樞密使處逐月抄錄事件送付史館

二年十二月詔曰史館所少書籍宜令本館諸處求訪
補填如有收得書籍之家並許進納其進書人據部帙
多少等第各與恩澤如卷帙少者量給資帛如館內已
有之書不在進納之限仍委中書門下于朝官中選差三
十人據現在書各求真本校勘刊正舛誤仍於逐卷後
署校勘官名宜令館司逐月具功課申中書門下

弘文館

後唐同光三年七月弘文館奏請依六典故事改弘文館為崇文館勅崇文館比與弘文館並置今請改稱頗

協舊典從之

時樞密院郭崇韜父名弘豆盧革希意奏改之故有弘文並置之言

集賢院

唐應順元年閏正月集賢院奏准勅書創修凌烟閣又奉正月一十二日詔問閣高下等級凌烟閣都長安時元在西內三清殿側畫像皆北向閣有隔隔內西北寫

功高宰輔南面寫功高諸侯王隔外面次第圖畫功臣題贊自西京傾陷四十餘年舊日主掌官吏及畫像工人淪喪集賢院元管寫真官畫真官人數不少自遷都洛京並皆省廢今特起閣時請先定佐命功臣人數下翰林院預令寫真本及下將作大匠與畫工相度門架修蓋緣院內有寫真官沈居隱畫真官王武瓊二人身死即日無人應用伏候勅旨勅集賢御書院復置寫真官畫真官各一員餘依所奏

五代會要

十一

五代會要卷十八

欽定四庫全書

五代會要卷十九

宋 王溥 撰

留守

晉天福七年九月勅留守之任委寄非輕凡降絲綸宜

同將相今後除留守宜降麻制

留守降麻自安彥咸始也

開封府

梁開平元年四月二十三日勅升汴州為東京置開封

府以開封浚儀兩縣為赤縣其餘屬縣為畿縣是月勅
東京諸城門宜賜名額宋門為觀化門尉氏門為高明門
鄭門為開明門梁門為乾象門酸棗門為興和門丘門
為含曜門曹門為建陽門後唐同光元年十二月復降開
封為宣武軍節度至天成四年五月勅汴州宮殿並去
鷓鴣賜本道節度使為治所其衙署諸門園亭名額並
廢

晉天福三年十月勅汴州宜升為東京置開封府以開

封浚儀兩縣復為赤縣其餘屬縣為畿縣應舊制開封
府時管屬縣分並可仍舊其月勅東京諸城門宜署名
額南面尉氏門為薰風門西面鄭門為金銀一作義門梁門為乾
明門北面酸棗門為元化門丘門為宣陽門東面曹門
為迎春門宋門為仁和門其牌額宜令翰林院書勒呈
進

周顯德五年五月賜東京城門名南面三門曰朱明門
景風門畏景門西南二門曰迎秋門肅政門北面三門曰

元德門長景門愛景門東西二門曰賓賓門延春門

又以大內舊扁賓
天門為通苑門

河南府

後唐同光三年詳定院奏近升魏州為東京臣檢故事
須先定兩府未審依舊以京兆及河南為兩府太原興
唐為次府惟復以興王之地別定府名勅故事雍州為
西京洛為東都太原府在兩府之次近以中興大業以
魏州為東京興唐府權名東都為洛京今後依舊以洛京
為東都魏州改為鄴都興唐府興北都太原府並為次

府

長興三年四月中書門下奏本朝都長安以京北府為
上都洛陽以河陽府為上從之

晉天福三年十月勅改東都為西京

京北府

梁開平元年四月改京北府為大安府長安縣為大安
縣萬年縣為大年縣仍置佑國軍節度使額

始命韓建
為佑國軍

節度使至三年五月
改佑國軍為永平軍

後唐同光元年十二月廢永平軍額復為西京兆府大安縣為長安縣大年縣為萬年縣

晉天福七年十月勅改西京為晉昌軍留守為節度觀察使仍依舊為京兆府在七府之上

漢乾祐元年三月改晉昌軍為永興軍

周廣順元年六月降京兆府同五府長安萬年縣為次赤縣

大名府

後唐同光元年四月升魏州為東京都督府曰興唐府元
城縣為興唐縣貴鄉縣為廣晉縣至三年三月改為鄴
都興唐為次府

天成四年五月勅先升魏州為鄴都有留守王城使及
宮殿諸門園亭名額並廢

晉天福二年九月改興唐府為廣晉府興唐縣為廣晉縣
三年十一月勅魏州廣晉府復升為鄴都置留守廣晉元
城兩縣為赤縣其餘屬縣為畿縣

七年四月勅鄴都諸門宜賜名額羅城南墉門為廣運門
觀音門為金明門橙糟門為清景門冠氏門為永芳門
朝城門為景風門大城南門為昭明門觀音門為廣義
門北河門為靖安門魏縣門為膺福門冠氏門為迎春
門朝城門為興仁門上斗門為延清門下斗門為通遠
門

開運二年四月勅鄴都依舊為天雄軍節度管內觀察
處置等使鄴都留守廣晉尹

漢乾祐元年三月改廣晉府為大名府廣晉縣為大名縣

周廣順元年六月以大名府元城縣為赤縣

顯德元年正月廢鄴都依舊為大雄軍大名府在京兆府之下其屬縣地望官吏品秩並同京兆府

諸府

後唐長興三年四月中書門下奏案十道圖以關內道為上遂以鳳翔為首河中成都江陵興元為次中興初

升魏州為興唐府鎮州為真定府皆是創業興王之地
請升此二府於五府之上合為七府仍以興唐為首真
定鳳翔成都江陵興元為次從之

都督府

梁正明六年閏六月勅宋州為大都督府其年八月勅
升福州為大都督府

後唐長興三年四月中書門下奏天下舊有八大都府
按十道圖以靈州為首陝幽揚潞鎮徐等州為次其魏

鎮已升為七府兼具員內越杭福潭等州亦相次升為都督府望以十大都督為額仍據升降次第以民為首餘依舊制從之

周廣順三年正月四日勅頃者淮海陸梁舉干戈而入寇湖湘覆沒致黎庶之倒懸惟彼武陵素稱雄鎮連營比屋皆懷勇烈之心戮力協謀盡復江山之境宜降褒崇之命以升忠義之邦俾列大藩永率南夏其朗州宜升為大都督府在潭桂之上

刺史

後唐同光二年中書門下奏刺史縣令有政績尤異為衆所知或招復戶口能增加賦稅者或辨雪冤獄能全人命者或去害物之積弊立利世之新規有益時政為衆所推者即仰本處逐件分明聞奏當議獎擢或在任貪狠誅戮生靈公事不治為政怠墮亦加懲罰其州縣官滿三考即具關申送吏部格式候勅除銓注其本道不得差攝官替正授者從之

天成元年十二月十九日勅尚書吏部侍郎裴皞所請
刺史三考方可替移免有行送之勞若非歲月積深無
以彰明臧否自此到任後政績有聞即當就加渥澤如
或為理乖謬不計月限便議替除

三年五月勅刺史以二十五月為限仍以到任日為數

四年六月左散騎常侍蕭希甫奏請條流縣令凡死罪
以下得專之刺史部內有犯死罪一人得專之觀察使部
內有犯死罪五人以下得專之勅刺史既為屬部安可

自專案牘既成須申廉使餘依所奏

應順元年三月二十日勅刺史縣令丞尉得替自今後如是見任官將已分錢物資送得替人即勿論其或率斂吏民以受所監臨財物論加一等如以威刑率斂以枉法論其去任受財人減二等

周廣順二年八月勅今後刺史縣令顯有政能觀察使審詳事狀聞奏朝廷當議獎擢百姓僧道不得舉請一切止絕

縣令

梁開平四年四月勅天下諸州鎮使官秩無高卑在縣令之下

乾化二年三月詔曰夫隆興邦國必本於人民惠養疲羸尤資於令長苟選求之踰濫固撫理之乖違如聞吏部擬官中書降授或緣親舊所請或為勢要所干姑徇私情靡求才實念茲蠹弊宜舉條章今後應中書用人及吏部注擬並宜省藩身之才業驗為政之臧否必有

可觀方可任用如或尚請託猶假貨財其所司人吏必當推窮重加懲斷

後唐天成元年八月勅中書先條奏州縣令錄正衙謝後合趨內殿謝辭者如今錄是除授宜令給事中引對如是指授者准舊例委三銓尚書侍郎各自引對仍須前一日閣門送狀

二年九月十九日勅近聞藩鎮幕職內或有帶錄事叅軍兼鄴都管內諸州錄事叅軍從前並兼防禦判官設

官分職激濁揚清若網在綱各司其局督郵從事兼處
尤難沒階則賓主之道虧下榻則軍州之禮失須從改
革式振紀綱宜令今後諸州府錄事參軍不得兼職如
或才堪佐幕節度使須具聞奏不得兼錄事參軍鄴都管
內刺史州不合有防禦判官之職今後改為軍事判官
如刺史帶防禦團練使額即得奏署防禦團練判官仍
不得兼錄事參軍如此則珠履玳簪全歸客禮提綱振
領不紊公途仍付所司

三年二月一十三日中書奏應天下縣令逐年夏秋兩
稅徵科公事伏以縣令之職徵賦為先若違限逋懸自
有罰責如及期了畢不謂功勞況今無彊名之科徭絕
虛係之稅額百姓據見苗輸納官中有指限程期蓋緣
每及徵科事歸煩擾未容輸納已切催驅州郡則推勘
吏人縣邑則禁繫人戶雖云提舉貴在徵求動涉旬時
固須妨事縱及期限倍困黎民自今後請祇委主簿縣
令勾當不得更置監徵每一州之中止限畢日委錄事

叅軍磨勘取最後逋欠縣分具本佐名銜申三司使舉
奏明行責罰其所欠稅額如是本道長吏及判官衙門節
級並形勢莊田不伏縣司徵督者縣令即須自經本州
論列如依前不納便可直申三司責罰之時以定輕重
其縣令到官之初須准近勅交割戶口帳籍至受替之
時比較多少如或增多即量加酬獎致逋竄則列示科刑
所冀賞罰不涉於過差公務率歸於修舉其本判官都
孔目官糧料使等職固不在親人公事止於提舉每至

徵科之日皆須一例獎勸或有徵督逋懸令佐獨當得
黜伏請今後凡是徵科畢日比較功過只歸令佐如是
一郡之內諸縣皆及期程公事修舉其錄事叅軍亦請
量加甄獎如管內諸縣並有闕遺其錄事叅軍亦請量
加責罰從之

其年八月二十五日及十月十五日勅條流公事數內
一件縣令化洽一同位居百里固在專勤課撫育疲羸
苟或因循是孤委任宜令隨處州府長吏逐縣每年考

課如增添得戶稅最多者具名申奏與加章服酬獎如稍
酷虐輒恣誅求減落稅額者並具奏聞當行朝典其縣
令仍勒州司批給解由厯子之時具初到任所交得戶
口至得替增減數額分時批鑿將來除官及叅選委中
書門下並銓曹磨勘宜令三京及諸道州府准此

四年五月五日戶部奏三京鄴都諸州府逐年所徵夏
秋稅租兼鹽麴折徵諸般錢穀先定格流如後

一若限滿後十分中係欠三分以上者本判官罰五十

直錄事叅軍罰七十直本曹官罰五十直縣令罰一百
直勒停簿尉罰七十直移攝閒官州縣押司錄事本典
及鄉里正孔目書手各徒二年仍配重役本孔目勾押官
典杖七十都孔目官勾押官杖六十並退職衙前收管
一若限滿後十分中係欠二分者本判官罰三十直錄事
叅軍罰五十直本曹官罰四十直縣令罰七十直移攝
閒官簿尉罰五十直州縣押司錄事本典鄉里正孔目
書手等杖八十孔目官勾押官典等杖六十孔目官勾

押官答五十

一限滿後十分中只欠一分以下者本判官罰二十直
錄事叅軍罰三十直本曹官罰二十直縣令罰五十直
簿尉罰四十直州縣押司錄事本典及鄉里正孔目書
手等杖七十本孔目勾押官典答五十都孔目勾押官
各罰五十直以上所立條件若是本判官錄事叅軍本
曹官孔目勾押官典等即取一州都徵額上比較其縣令
簿尉及典押以下即將本縣欠數比較

一所徵夏秋兩稅依省限了絕者本判官典申奏改轉
官資錄事叅軍縣令申奏與量留一年或界分已滿去
即轉兼官如一任之內稅賦不牽即奏加章服若是攝
官亦委本處長吏更令攝任一年如更立勞能具狀申
省以憑申奏必降真命本曹判司簿尉即申奏請減兩
選或一任之內稅租總了絕或是攝官委逐處申省點
勘聞奏別行獎酬州府都孔目官勾押官本孔目勾押
官典等以軍職轉選其都孔目官勾押官如已至押衙

職名或舊有官資亦議申奏獎酬州司並逐縣徵科典
押每處與賞錢三十貫均勻分俵

長興元年七月勅訪聞諸道州府縣官自徇虛名不
惜人戶皆於省限前行帖催驅須令人戶貴買充納此
後徵科事辦亦不酬勞本處不得申奏如違限稽慢即
准條流責罰如添得廨宇招得流民無害于公私者當
以名聞特行恩獎

二年八月二十三日諸道奏薦州縣官前銜內有賜紫金

魚袋者奉長興元年九月十七日勅州縣官若循常例
十六考方得叙緋倘或已佩金章固難却為令錄必若
藉其才器則可別任職資須協通規免踰定制宜令今
後諸道州府不得以著紫宜身奏薦為縣官者奉勅文
資官階銜內已有金紫尚不許却為州縣官其武職銀青
階銜亦宜條理宜令諸道州府自此詳文資賜紫例不
得更以帶武職銀青階銜奏薦為州縣官員仍付所司

五代會要卷十九